

息

齋

筆

記

素衣吳觀華先生小叙

荆溪教弟儲乾撰

素衣吳觀華先生梁溪世裔也何以辱與荆溪之儲  
乾交作合於龜山也龜山者何晉陵東南震澤之濱  
吾

師錢啓新先生遯世處也錢師以萬曆丁巳隱於此  
山乾與

素衣先生俱以尋師問易不期而至九月中錢師歿  
卽葬於龜山之西灣素衣與乾不忍遽治任約三年

之內仍學於此山近師墓而興思焉方其在龜山也  
每日之晷遊於山之巔就松根石磴以考業焉先生  
雖五年以長於德於學不敢肩隨也一日節至將歸  
乾與先生緩步於山麓而先生慨然色喜曰看此番  
回去蓋躍有昨非今是之意而欲見之行也自是而  
後凡見之行者於頽風敝俗盡行裁革先生於世味  
中一脫盡脫亭亭獨上矣東林之擔以身肩之而有  
裕矣講云乎哉先生之德於是而日新先生之業於  
是而日進雖未見之大用在易漸之上九鴻漸於逵

其芻可用爲儀吉先生有焉龜山一遇乃得此人豪  
其實啓新錢師作之合也邇年來先生因宿症頻作  
謝客靜攝或子夜亦做這功夫如此者浹歲乾因秋  
會偶於中庭間叩之先生微示曰亦只是心與身一  
未能心與理一此先生之自道也而其心與理一已  
在言表矣自龜山分袂後先生曾致東與乾有云窓  
前憶共龜山月嶺上思看馬蹟雲皆當年實事也不  
雕琢而自工緻情景婉然竝常以爲口占先生豐頤  
胖體胖面盎背一見而有道之氣象易知也然存養

純熟條理微密習見而渾然之妙用難知也大抵與忠憲高先生正是一堂人物時友多樂先生春和滿腹爲易與而不察先生秋嚴微至爲未易與也乾質魯不長於言但承德甫善甫良甫三君之命不可無一言以報而搦管實兢兢也然經畬鄒先生之誌認菴華先生之序言之盡矣足以闡先生之幽微矣乾又何言但有拭淚而已嗚呼昔年先生新置幽居招乾偕樂之懸一軸雖雉於堂中時哉時哉寓意豈不美哉徐而默然思之我心不快何也不遂有共之者

乎竊以爲獲麟之兆寓意於此幾兆於此有象則有  
占何今之雌雉而非昔之雌雉也特未可言也又按  
獲麟之歲在庚申泰山頽於壬戌今素衣先生適捐  
館於壬申其幾如此神矣哉欲再與先生語之而不  
可得矣噫

崇禎六年三月庚子謹序

觀華吳先生進道之序

教弟華貞元記

先生名桂森、字叔美、別號觀華、延陵季子後也。父給諫震華公、母孺人曹氏、以嘉靖乙丑之歲八月二十三日生先生。乙亥給諫公歿、先生年甫十一、以不得致養爲終天之恨。戊子遊庠、辛卯廩諸生。己亥曹孺人歿、先生年三十九日、吾終日咕嗶、冀得寸進以慰母耳。今已矣、卽斷名心曰吾聞人子以不辱身爲孝、其以事親乎。迺從事問學。甲辰東林書院成、吳越士

友會集其中先生以朋友講習不可不謹約爲朔會  
折衷於景逸高先生五經學者家常茶飯不可不講  
約爲經會參酌于明經諸友自以賦性清狂交慕素  
心則相約爲會者又不但以講而以心啓新錢師通  
迫欲以易授矣謂先生曰我之求人甚於人之求我  
癸丑冬設臯比東林迎錢師講易旋與諸友約曰吾  
輩入東林決不可資人之勢先生蓋將人隱微俗腸  
抉出今轉向高明路頭耳錢師卒講喜甚曰吾道行  
於錫矣夫易者象也像象者人自錢師喚醒人道先



生通知八物全備。參兩爲一者。人先是東林每大會。四方冠蓋雲集。間拈書義一二。迨高先生主盟。推先生講席。曰。今日之會。始真。每赴經正堂會。錢師獨以先生名點示衆友。曰。此真道學。乙卯先生年五十一。以貢舉試第一。便作了勾。師曰。觀華出邪。司教尚有。人曰。吾向誰開口乎。吾從東林先生遊。朝斯夕斯。終身焉。於斯廢幾有聞耳矣。丙辰倡道鵝湖。諄諄爲勉。曰。當今此學孤立。責豈不大。事豈不難。程夫子云。重担子。須得硬脊梁。漢其振鐸於聾聵之世。扶陽於積。

陰之日爲東林表表者原始寔自先生丁巳仲春會  
錢師日一息千秋先生適就師于龜山以易正焉草  
像象述非避作不敢居要以見崇效卑法之意云爾  
錢師沒先生偕余與恕行儲先生會龜山三年廬冢  
之思也嗣後歲會毘陵善繼其志也謂諸友曰入錢  
師之門方知立身行已之嚴名利心絲毫未斷勿得  
言學戊午舉家會會必手書詩禮兩條粘之壁若曰  
居家而理止是性情調攝就詩禮可味也語余曰吾  
年未艾便將先業分撥人亦謂我得也倣余輒未得

余曰先生日勤事於詩書師友言足則行足法其下  
愛而敬之人能乎。做先生之分不做所以分得乎。故  
惟先生有家。易云王假有家或勸出家曰吾在家出  
家而尚出乎先生一切家務處之以理不與以我。便  
是出也。否則終跳不出一我字。惡能出家。故惟先生  
出家。易云出自穴穴陰所安也辛酉高先生北上以

東林。曠先生主盟向奉教高先生者咸皈依先生以  
先生主東林東林主先生也。道學其有傳乎。高先生  
曰觀華善用易以先生用易易用先生也。易道其復

興乎乙丑毀書院人便諱講學且虞禍先生曰吾嘗以黨錮諸賢質吾師師曰那能得此造化邪蓋造化生生不謂陰慘而或斷於一息剝而復也其先生之天行乎是時堅志者尚數人僻遠間起容有之然無講習之所矣寧但已乎九日會鴻山盤旋石壁之下吟曰坐談莫畏西風急玄酒斟時宇宙春兌而震也其先生之游雷乎會蓬萊會華藏會荆谿會于山之首河之干在處提醒焉當黑夜時種得星星火以待日出舉火坎而離也其先生之繼明乎憶余初交

時覺先生臨下太嚴情如不能達性稍急有不可於  
心則發或移時不解先生曰吾近反家庭左右前後  
渙然各心學問不得力正在此然庶幾所以感之者  
曰需而已矣後乃愈和人得先生懽有事喜色相商  
能得隱情如一二童僕若自率其天者先生以藏身  
之恕喻諸人蓋久而徵矣親者如其親故者如其故  
笑語懽狎人自意適焉道雖孤高相與無異朋友各  
如其朋友謂講習不可久輟春和則會秋爽則會以  
歲暮爲考德課功時則會日草野之人自相聚樂諒

無與時禁也。茹淡衣素。非爲節省。就便濟施。必以義。急人難不居。德曲體人情。不徇情。無藝之征。必如其。令莫夜戎之。不驚駭。橫逆卒至。則謹避之。絕不向人。言。修形豐願。神凝氣爽。格清而色榮。潤意趣暢而節制。自存。心事顯明。用意微婉。無事靜坐。卓然豎起。如緊握。然有事應酬。專一無二。必期了結。纔了。便休講論。必覈又每大段發出不瑣屑。聽人講。忻忻如也。竟其說不漏一語。亦不從中斷截。橫起一見有不合。曰且商量。言而當。輒錄之。友有悟未到者。或爭之急。曰

且從容自然知其自認了悟者不爲置辨慕名而來  
殊不見意趣則任其去聞一友根器善亟致之徐爲  
開導後生小子念頭向上卽忘年下之以致誘掖有  
縉紳開講而借重先生者卒不一就其爲量大任人  
飛躍不束以繩度其爲教微非細心觀察不知其意  
義所在也先生曰中節者天理合縫處也自然和余  
故審視於容色言動處已處人之際稍得先生之和  
卽其可見用顯而其不可見者體隱躍如矣余與先  
生相處最久親先生矣懼行已不可對先生尤懼獨

知萌念處不可對先生若乃人之領取不同則又各厭所欲而去此先生風雷物物震動而巽入之也蓋先生學力大改過勇實就氣質變化又從難克處克將去勤敏讀書日用飲食皆體察實地尊師取友嚴憚切磋乃陶鑄實功理明則心靜心愈靜則理愈明兩者交資日有進益不可量也先生一日睡起結裾豁然大寐得醒向來諸想忽爾解脫余問作何景象曰一念不起鬼神莫知默識乎此一可主矣大抵東林學脉言體必於用離體無用離用亦無體言悟



必於修不悟何修不修亦何悟先生蓋經二十多年  
切身修証而一朝聞之豈易言歟譬如虎之可畏人  
盡會說終不似曾經虎傷者出口自異爲實見得也  
丙寅高先生沒乃敘明興以來七先生語錄合爲一  
編復剖其異而表其同曰真儒一脈脉不一卽非儒  
儒亦非真先生編是錄也所以明其傳之有在而以  
俟後人也其旨深哉戊辰年乃著一斑錄道體固自  
全現見者多囿一偏君子之道鮮矣先生著是錄也  
蓋謂前此之見以我見道止是一斑後此之見以道

見我一斑而全體矣

其傳在是

其他所著不可殫述

至如禪門直指修真要訣則就心與氣之同而揭其  
端頭之異也未見道卽是博禪既見道無非窮理譬  
如海灌百川歷百川而遡之既見全海涓滴皆海水  
也其謂高先生之道一以貫之夫亦見而知之也歟  
向問先生睡時若何曰吾睡不便放倒須收攝此心  
至是而靜焉致虛動焉致察無非心矣故曰乾以君  
之胃天下之道學者最苦物欲之累動卽撲滅之終  
未得力先生曰不在動念時也爲胸中尚留得些子

根株看來只是心君不出頭之故。心君不出頭。看來  
又只是敬不足之故。夫乾其靜也專。專之爲義。主一  
之謂本體。惟是一箇本體。工夫須做專主工夫。一非  
落空。主不着相。不落空。一卽是主不着相。主卽是一  
敬成片段。一可得矣。數年來先生舊病時發。然一心  
只做向前事。致愛先生者。常以藥餌勸。或謂可鍼。而  
愈。或謂其得老氏術。可邀致之。先生亦未直拒也。微  
笑而不答。若曰。以是年。以是病。應去便去耳。多方以  
求生。却又多一事。其無所事禱之意。隱然見矣。病少

間輒看書尋復會友人謂先生且休日吾安閒至此  
尚安閒邪若并其病而忘之余故謂己亥以後透過  
名利關乙丑以後透過灾禍關此則死生關頭抑且  
透過謂二氏一大事爲了生歿吾儒一大事爲了性  
命生歿是他一已生歿不能出家性命還是天地民  
物公共性命有家無妄之往何之矣勿藥有喜其庶

乎崇禎二年己巳允復書院先生卽自經營先構麗  
澤堂不日成之與經畬忠餘兩鄒先生倡和其中昔  
年諸友仍疊疊輳集喜慶復覩舊時威儀先生曰冷

淡莫如今日。卽今來者向學者也。越冷淡越真切。堂  
右另築三間。題曰來復齋。易云。麗澤兌。君子以朋友  
講習。又云。朋來無咎。七日來復。先生蓋謂不講習。何  
由來復。不來復。何貴講習。故麗澤堂仍其舊。來復齋  
銘其志也。先生之學克己而能復者。將以一己之復。  
爲朋友之復。世道人心之復。僅僅復舊跡而已乎。乾  
三爻曰。終日乾乾。反復道也。庚午賓筵。尊先生於乾  
位。洵足以當之人。只有天地心。其復也。須靜養。以先  
生之學。不獲當世之用。亦不求用於世。閉關之義。嚴。

矣。詔修熹廟實錄。入先生於丘園。傳洵足以當之。謂余曰。近來諸友。儘有理會心性者。余凡事放得下。惟放東林不下。余則謂凡事放得下。故放東林不下。放不下者何。天理民彝。不容泯滅者也。衆人都放得。

下。惟聖賢放不下。

又語余曰。當年被難。諸君恁大關。

係。却未知易學。今日如有以易來者。雖病卧床褥。猶當強語之。蓋以廣吾師之教也。先生著乾坤否泰之說。直是以人道挽回造化真消息。而學易金針。則引向入門而挈其要領。雖不得其人面授。一生學易精。

神已世世矣。從來聖賢非通卽窮。文序先困後井。孔  
序先井後困。反覆原只一事。辛未春先生退處僻巷  
懸雌雄困象也。時也。壬申懸朱子像以沒身相遇也。  
可知井通矣。十一月朔余赴會孰意先生竟于是日  
長逝。痛也。何如余謂先生進道譬之山焉。望而趨之。  
一步近一步。登而涉之。一步超一步。至頂以上已不  
屬山。則向年豁然大悟者。不容說矣。天一也。其下有  
山歟。其在中歟。卽上卽下。卽內卽外。遯而畜也。其  
先生之一貫歟。先生之子德甫。善甫。良甫。能養志者。

也。所放不下者。端在三君矣。



息齋筆記卷上

錫山吳桂森叔美甫著

伯淳在澶州日修橋少一長梁曾博求之民間後因  
出入見林木之佳者必起計度之心因語以戒學  
者心不可有一事按程子非簡心之密何能自知  
至此庚申

賀克恭簡陳先生屢承開示潛玩久之乃知此理克  
塞天地貫徹古今無處不有無時不然事事物物  
各有本然之理吾人何必勞攘勿忘勿助循其所

謂本然者而已。然雖見得大意如此。苟非格物致知。灼見事事物物本然之妙。烏能勉強以循之。此知之所以當先也。然非敬以涵養此心。使其常主於中。不馳於外。則身且無主。雖視弗見。雖聽弗聞。至粗至近者。且不能應酬之。況于究義理精微之極乎。此涵養之功。所以又在知之先也。以是知今日用功之始。惟當先事涵養。放心不收。終難爲學。此則決無疑矣。按此語切近精實。克恭學白沙而不涉玄虛如此。

錢先生曰人言知過悔過尚是虛事須是補過補得一分方改得一分補得二分方改得二分

邵子詩請觀風急天寒夜誰是當門定脚人譏禪伯也或曰豈有能靜而不能定脚者乎余曰此有明證昔有老僧山居客問所得如何老僧吟曰習靜山中二十年也無凡火也無烟客去侍者問客何語老僧復舉前詩侍者倒麈尾擊老僧首一下老僧勃然建大杖撻之侍者前走老僧後追侍者高吟曰習靜山中二十年也無凡火也無烟若將塵

柄輕輕打燒壞三千與大千蓋却事求靜與時行時止之靜其不同自如此或又曰此是老僧修行無力真能禪者豈其然余曰卽二十年苦行尚無禰柄便是誤人不小試看邵子冬不爐夏不扇二十年成個恁般氣像所以禪門要禿捷徑到底只是梯接以凌虛空朱子說得好使有捷徑可禿堯舜周孔豈故爲紆曲以誤人耶

朱學王學之不同或曰朱重修王重悟朱言功夫王言本體非也朱以仁義禮知言性王以虛無明覺

言性此其本源之絕不同處也陸學與王學又微有別陸以行誼徵心王則專言知而已故王曰象山只是粗所以陸近告子王是迦文千古而下斷乎難揜

宋澶淵之役帝親征命王旦留守旦曰願宜寇準臣有所陳準至旦奏曰十日不捷何以處之帝默然良久曰立太子按兵凶戰危勝敗無常故旦爲深遠之慮曰十日不捷可謂直言無諱矣此之爲社稷臣帝曰立太子可謂深根固本矣此之爲真明

主當其時內有王旦外有寇準如此可謂戰勝廟堂

少陵忠憤有離騷之思篇中麗人行副筭六珈之什也秋興八章彼黍離離之咏也含意深遠讀之有無窮之感取最沉鬱者爲箋釋一篇夔府孤城落日斜身在夔府每依北斗望京華心在京華聽猿

實下三聲淚

在夔府

奉使虛隨八月槎

望京華

畫

省香爐遠伏枕

望京華

山樓粉蝶隱悲笳

在夔府

請看石上藤蘿月

追憶京華之月

已映洲前蘆荻

花

日中夢府所見

舊解殊未識其意

有學者受橫逆欲忍則不能堪欲訟又知其不可請  
問於陽明先生曰聖賢處此有道乎先生曰聖賢  
豈無善處之道但子心未平氣未和未可以語待  
子心氣和平而後語之數日復見曰覺得邇日心  
漸平氣漸和敢請教先生曰既心平氣和又何待  
問

有求親誌銘於陽明先生者先生諾之而久不與但  
令門下士日與之言學其人葬期已迫文終不可

得托門下辭歸先生曰試爲我問之求誌銘意欲何爲其人曰不過爲光顯吾親計先生曰更爲我問之古有叔梁紇者何人作誌銘乃得光顯如此其人良久痛哭曰命之矣今不願得文歸而葬親來從先生學做人先生喜曰文在此矣授誌銘

覺一也從仁義禮知有覺真覺也此之謂性靈若曰穿衣喫飯運水搬柴有生後之覺也此之謂形靈至于甘食悅色則正迷而蔽此覺者也世以捧茶童子馬上俯仰證心吾不知於性靈之覺何如



趙襄子無恤趙簡子之次子也。長曰伯魯。簡子賢無恤。故舍長立幼。然無恤既立。以伯魯之故。有子五人而不立。後立伯魯之孫浣。是爲獻子。獻子生籍爲諸侯。按無恤可謂不忘本矣。猶有三代之遺風焉。視趙匡義何如。

披裘公夏月衣敝裘。荷薪於道。道有遺金。不顧。季扎見而呼之曰。負薪者何不取金。公笑曰。君何居之高。視之下。貌之君子。而言之野也。吾有君不君。有友不友。當暑衣裘。君疑取金者乎。請問姓氏。曰子

乃皮相之士。何足與言姓名。遂去。相傳披裘者晉陵茶山路人也。

茶山路在郡城西南

楊元甫。陝西高陵人。博學高行。元祖累徵。不應。後元造曆。曆家以爲非元甫不能成。元祖知其不可。屈用。四皓禮太子。致書幣。不見。帝許以曆成而送還。山元甫乃應聘。後歸。日公卿祖送。許魯齋嘗謂門人曰。千古曠典。爲斯人所舉。其功與肇修人紀者同。呂涇野先生曰。魯齋初出。欲用夏變夷氣魄。亦大。後因其志不行。於心不安。故獨重於元甫。由此

觀之魯齋之仕其悔之甚矣。所以歸時元祖特授以詔。今其設教魯齋置梁間。絕不以示人。旣歿而家人發之。方知詔書也。又囑家人勿請贈謚恤典。其意可知矣。蓋以不如楊爲第一乘品格也。欲定魯齋出處此事可以斷。

漢光武使左中郎將鍾典授皇太子及宗室諸侯春秋賜與爵關內侯典辭以無功。帝曰。生教訓太子及諸王侯。非大功耶。典曰。臣師少府。丁恭於是復封恭而與固辭不受。按光武可謂明矣。能封儒臣。

又能封其師鍾典可謂賢矣能舉其師又能卒辭其爵真儒林千古盛事可紀

康節詩有刀難剖公閤腹無木可梟元海頭禍在夕陽亭上語上東門嘯浪悠悠賈克字公閤劉淵字元海舊註云夕陽亭帝以賈克督雍州克不欲行因公卿餞於夕陽亭問計於荀勗勗曰但聯姻帝室則自止矣克從其計因納女太子卽賈后也後濁亂晉室致五胡雲擾皆原於后按詩首句傷魏祚也次句傷晉室也納女事未盡詩意記漢安帝

延光三年三月帝策收太尉楊震印綬遣歸故郡  
震至城西夕陽亭慷慨謂諸子門人曰吾蒙恩居  
上司疾奸臣狡猾而不能誅惡嬖女傾亂而不能  
禁何面目復見日月飲醪而卒康節似指此事上  
東門嘯卽王衍識石勒故事夫自魏晉篡逆五胡  
亂華天下大亂數百年不知皆自漢末不競小人  
害君子致之也此世道泰否升降之幾非識微君  
子孰能知之

宋徽欽在沙漠時遇胡僧能言宿世因二主問歸宿

地僧曰一爲鍋內之油、一爲馬足之泥、後徽宗以不得虜命、不殯斂、欽宗日夕撫尸號哭、數日後一虜持鎗至、挑其尸去、欽宗號呼隨之、至一山谷羣僧無數、見方池大畝許、浸油燃燈、虜投尸其中、欽宗大呼、亦欲投池中、衆僧止之、不許曰、非上命安得入、後金亮出獵、命欽宗與遼主執戈爲導、鐵騎後隨、忽一虜箭射遼主仆地、鐵騎蹂而踐之、欽宗因思馬足爲泥之言、于是臨高崗自投而墮、鐵騎亦蹂而踐之、

出

太祖高皇帝親書

按二主之

慘與青衣行酒一轍其禍當始於何時或以爲罷  
李綱以謝金人便知必至有此愚以爲不待至此  
也章惇入相陳了翁問今日爲政何先惇曰司馬  
光姦邪所當先辨了翁曰如此公誤矣惇不悅宋  
室之禍幾分於此時靖康時天下之怨毒已必不可  
解上帝之震怒已必不可回克廷之羣姦已必不可  
盡洗而滌除所以雖有李忠定岳少保必無  
可成之功益極重之勢然也

鼯鼠口甘

範衍

嚙人使人痒而樂須臾歿矣此天地

間之最毒物也。蛇虺毒人，猶痛而知避。至此物則  
昵就之而忘其死。佞人甘言，婦寺軟媚，足以使人  
樂就而卒以斃身隕國。與鼯鼠何異。可畏哉。可畏  
哉。

光武廢郭后，立陰貴人爲后。郅惲言於帝曰：臣聞夫  
婦之好，父不能得之於子。況臣能得之於君乎。是  
臣所不敢言。雖然，願陛下念其不可，勿亂大倫。使  
天下有議社稷者。惲意恐動搖太子也。帝曰：惲善  
恕已量主。知我必不有所左右而輕天下也。按惲



可謂忠矣。能先幾而蚤諫，帝可謂能受言矣。不以私愛妨大計，然而終不免太子之廢也。故方希直題釣臺詩曰：敬賢當達色，治國須齊家。如何廢郭后，寵此陰麗華。糟糠之妻尚如此，貧賤之交奚足倚。羊裘老子早見幾，獨向桐江釣烟水。其譏光武者深矣。按：惲在王莽時，說莽曰：天變於上，民叛於下，觀天意，民心明示公以反正之路，何不復子明辟莽，怒囚之？又說太子疆讓位於明帝，得兄弟善保，可謂明哲之士。光武猶不能盡其用。

沈石田名周題趙子昂苕溪圖詩吳興公子玉堂僊  
畫出苕溪似輞川兩岸山烟樹裡何無十畝種  
瓜田石田此意卓然高士品格子昂在下風矣

永樂間有樵夫樵會稽之耶溪上日鬻薪一束足食  
則已食已畫詩於溪沙畫已輒亂其沙人恠之一  
日窺其畫從後抱持之乃識其詩云夢入鵷班覲  
紫宸覺來依舊泣孤臣半生家國惟餘我萬里江  
山已屬人無地可容王蠋歿有薇堪濟伯夷貧伶  
仃苟活緣何事要了熒熒一點真尋匿去不知所

終又蜀山絕頂石壁上題詩云一個忠成九族殃  
全身達害亦天常。夷齊歿後君臣薄。力爲君王固  
首陽。按革除間歿節之外如此者更多不勝書何  
忠臣義士之多也。固錄 聖祖作養拔擢於上亦  
錄濂洛講明人心一脈於下所以人人能奮九歿  
不移氣節凜凜與日月爭光竊謂可與唐虞之際  
九官十二牧師師濟濟於同堂者絜芳比盛千百  
世之下難乎其繼矣

蘓東坡宿禁中召入對便殿宣仁后問曰卿前年爲

何官曰臣爲黃州團練使曰今爲何官曰臣今待  
罪翰林學士曰何以遽至此曰遭遇太皇太后皇  
帝陛下曰非也曰豈大臣論薦乎亦非也軾驚曰  
臣雖無狀不敢自他塗進曰此先帝意也先帝每  
誦卿文章必歎曰奇才奇才但未及進用卿耳先  
生不覺哭失聲這一哭自有個來歷東坡自雄其  
才爲小人所齟齬至于淪落負感久矣一聞此語  
乃知蒙神廟識賞益動身世之感所以不覺失聲  
此哭雖是發於忠愛至情畢竟從知遇上感恩來

大臣以道事君者自無此哭。予友華始德之論如  
此。按哭後又少了一番進言。宣仁與哲宗亦泣左  
右。皆感涕。這是一段良心發動時節。豈可無忠言  
懇誠以感動之。若曰臣素以愚戇觸冒先帝。先帝  
不罪以死。而欲用臣。至仁也。今太后皇帝思先帝  
言。召臣。願臣有一二愚忠。可採採而行之。庶幾可  
以報先帝而忠陛下。若但榮其身。雖肝腦塗地。臣  
無由報稱也。有此一段忠益。方不虛金蓮燭一番  
盛事。

觀察使于頔

音迪

問一僧曰、教中言卽心卽佛、如何

是佛、僧不對、又問黑風飄入羅刹國、其義何如、僧  
直呼公名曰、于頔何人而乃問此、于勃然作色、僧  
舉手向公曰、此一念黑風飄入羅刹國、公爲之降  
色、肅然起敬、僧復舉手曰、卽此念是佛、二語頗警  
切、一念之善、景星慶雲、一念不善、妖星厲鬼、誠在  
反覆間、而其語則奇文也

程子曰、化天下只是一個風、吾錫女烈如儲義士妻  
范、秦妻熊、浦孝子婦過表表著矣、邇萬曆歲東門

有陳烈女未嫁、聞夫歿遂縊、鄉紳爲立祠、歌詩紀其事、一時風起、有鄒貞女、有陳貞女、予友陳毅菴、廷策之姪也、有劉氏婦、予世交劉體泉次婦也、陳女截耳自誓、劉婦自投河救甦、三女皆未嫁、著節者、又予友華介石妻薛氏、少養於薛翁、歸華歲餘而孀、無子女、後養父母、又卒、焚焚獨守、最茹荼苦、數年卒、又予友莫用章內子之姊陳氏、適張、以念父母不得見、自縊、歿於孝、皆炳炳天理、民彝、烈丈夫所難、五女皆有鄉達傳誌、可哀爲一秩、爲錫中

閨媛之勸

錢先生在龜山一日出源滙二編以示因曰中有可疑者須商確余受讀後會先生問二編有所見否愚因請曰管幼安陶靖節俱一時矯矯以附見不另立傳必有深旨先生曰陶大節著矣然聖賢達有達之事可做窮有窮之事可做寄情詩酒未脫江左餘習若幼安粹乎其質只有一事未盡善細詳方見愚不敢請其事因簡本傳黃初四年詔公卿舉獨行君子司徒華歆薦寧文帝卽位徵寧遂



同家屬浮海還郡詔以寧爲太中大夫固辭不受  
明帝卽位太尉歆遜位讓寧遂下詔曰太中大夫  
管寧曩遭王道衰缺浮海遁居大魏受命則襁負  
而至而黃初以來徵命屢下每輒辭疾今以寧爲  
光祿勳禮有大倫君臣之義不可廢也望必速至  
稱朕意焉寧稱草莽臣上疏曰臣海濱孤微罷農  
無伍祿運幸厚橫蒙陛下纂承洪緒德侔三皇化  
溢有唐久荷渥澤積祀一紀不能仰答陛下恩養  
之福沈委篤痼寢疾彌留逋違臣隸顛倒之節夙

宵戰怖無地自厝按管雖終身不受僞祿而篡逆  
方行聞命來歸與耻食周粟採薇首陽之意則有  
間矣是昔日遼東之避不過保全性命非爲綱常  
表大義也一事未善意在斯乎

司馬溫公曰釋氏之言其精者吾儒自有之其誕者  
吾不信也此語最公平如其言曰撲地非他物縱  
橫不是塵山河與大地全露法王身又有言曰有  
物先天地無形本寂寥能爲萬象主不逐四時凋  
此皆竊吾儒之精者也如楞嚴所載曰迷妄有虛

空、依空立世界、想澄成國土、知覺乃衆生、此則張子所謂以人見之、小因緣天地者、雖曰人以妄心自起、虛空見自起、世界見、然又曰、想澄成國土、知覺乃衆生、則誕矣。

六朝劉宋衡陽王義季嘗春月出畋、有老父被苦而耕、左右斥之、老父曰、盤于遊畋、古人所戒、今陽和布氣、一日不耕、民失其時、柰何以從禽之樂、而驅斥老農也、義季止馬曰、賢者也、命賜之食、辭曰、大王不奪農時、則境內之民皆飽、大王之食、老夫何

敢獨受大王之賜乎義季問其名不告而退此終  
縣老也論者嘗謂晉至五代無人非無人也世污  
道喪德潛而弗耀耳觀此老言談及辭食晦名豈  
一徒隱者其品格在五柳已上義季知其賢矣不  
載以歸朝僅問其姓名何爲哉昔吳陸喜論亡曰  
孫皓無道吳國之士沈默其體潛而不用者第一  
也避尊居卑祿以代耕者第二也侃然體國執政  
不懼者第三也斟酌時宜時獻微益者第四也溫  
恭修慎不爲諂首者第五也過此以往不足復數

論士於末世宜以此爲準

唐李涉泊舟遇夜客詢知李博士久聞詩名乞一詩  
李曰風雨瀟瀟江上村綠林豪客夜知聞相逢不  
用相迴避世上如今半是君盜喜遂舍之而去又  
劉文成梁山泊分賦臺詩突兀高臺累土成人言  
暴客此分羸飲泉清節今寥落何但梁山獨擅名  
咏二詩不能無慨于今之居民上者且聞名而索  
詩聞詩而喜舍或有不及此風者矣

康節伊川論雷聲一案伊川所云起處起非漫然捷

對也有個至理蓋雷雖變化難窺然只是陰陽升降之氣氣便可按而知其出何以可知隔歲秋分收聲日是其入幾也冬至日微陽初動是其復幾也立春日陽長是其萌幾也以三日支干推筭其聲發之遲蚤可知也觀冬至日風氣何方來則雷出何方此感通之幾其聲發之方向可知也從東北而聲於西南爲順布則時和歲豐從西南而達東北爲逆布則反此總是天地間一定之氣識其法人皆可筭所謂有司之事也儒者一切不問但

雷出有節宣入亦有節宣順布適得其常逆布不能爲災此爲先天而天不能違之道方知小小前知都可以不事故曰旣知又何煩推筭只說起處起一因其自然胸中一毫不曾勞擾省多少閒思非見道何能及此康節會得故不覺稱善云

呂純陽得仙術於鍾離正陽因曰何不以廣度天下正陽曰豈不願哉固仙林難遇也純陽不以爲然正陽曰子試爲之于是純陽現化立教說長生之法從者數百人一日示病從者漸去已而病漸重

益散去止存數人純陽曰吾疾不可居此當移入山願往者從同行僅三四人至中途遇大水純陽曰須負我以涉諸人皆不能惟一人直前負師涉中流純陽喜曰得一真仙材幸矣及濟登岸視之卽鍾離子也誠心學道其難也如此錢先生偶舉此語因曰所以說師之求第甚於弟之求師余時在坐不覺汗沾於背

薛文清曰少陵詩水流心不競雲在意俱遲從容自在可以形容有道者之氣象寂寂春將晚欣欣物



自私可以形容物各付物之氣象江山如有待花柳自無私唐詩皆不及此氣象

借問天源深幾許。古今常只是滔滔。年年成就無邊物。本體何曾減一毫。

薛讀書錄

程子易傳謂能盡得四聖之意則所不敢知至其關切世道人心開示學者蘊奧則至精至微謂與易同功可也故朱子於本義却不盡同傳旨而爲近思錄則纂取傳文無遺此真得程子之精髓者

伊川先生涪州之行程公孫與邢恕

公孫先生之姪

邢恕先生門人爲之也同門中愠之言於伊川先生先生曰族子無知不足責故人情厚不敢疑直相忘於天高地厚之中此是何等氣象論二人真得罪名教豈不可惡然就吾道論之世途中齟齬原一毫無加損自應度外置之近見學者妄談冒觸時忌有恐其遺累門牆因而深咎之者或未聞伊川先生之風乎

辯王學者多闢其致良知之說夫致良知有何病陽明之學與朱矛盾處在於掃敬字惟其認本性爲

無善無惡、故認敬皆爲強多事、此禪宗本旨、其流弊有不可勝言者矣、試觀今日高談致知之人、駸駸無忌憚一路、其陷溺人心、豈不可畏、乃陽明當時以朱學比之夷狄洪水之害、是何言歟、是何心歟、今雖倖得從祀、後必有議之者、陽明譏朱子曰合之以敬而益緩

禪學混儒無煩深辨、一言以蔽之曰、舍修齊而談性命、

聖學敬爲主、固矣、然敬字甚不易識、故先儒懇懇言

之曰主一之謂敬無適之謂一試思無適之義何如又曰看喜怒哀樂未發前氣象試思未發氣象云何此處非精心體認參詳何由觀彷彿能真識敬然後能真無事不言敬而言本無事妄也故程子曰學者須先識仁不曰求仁存仁而曰識仁識字有無窮旨趣愚謂識仁則識敬矣

辛酉

衣冠之禍三西晉長沙王歺傾國而南石勒以輕騎追及之執文武三千人曰此皆晉之貴戚公卿不可加以鋒刃坐於排墻之下壓歺之又元魏胡太

后弒主亂政爾朱榮以兵入都殺后執宰相以下  
二千人令胡騎圍而射之謂之河陰之役唐朱溫  
劫唐帝遷都於汴至白馬驛宰相崔昭遠以下數  
十人盡殺之投屍黃河曰此輩清流當投之濁流  
噫是皆禮樂文章之士受此慘毒疑於天道反常  
然細而考之晉當昏主淫后瀆亂於上諸王骨肉  
相殘於下此乾坤何等時而舉朝方且清談莊老  
以爲風流魏本夷狄不足言然后以母弒子與元  
乂亂俾之執政窮剝民生以奉佛教而舉國俛首

傍觀若罔聞知唐之末造宦官柄兵天子廢立出其手藩鎮縱橫而執政方且各倚外藩以自固以此其時尚有忠義之士一人焉肯立於朝者乎則祿祿在位非利祿之襲襲卽無知之羊豕其及宜也然石勒歿未暝石虎盡殺其子虎歿石閔盡殺其子惟石琨一人無所之自歸於晉詔斬於市錫氏遂絕爾朱榮分命族人典兵外郡然卵翼高歡子卽歿於歡之手因命州郡所在盡誅爾朱氏朱溫身弒於子友珪弟友貞復殺友珪不三年李存

筋入大梁朱氏無少長盡斬於市凡數百口雖女子孩抱無遺類凶人之報亦何常與毫髮可見衣冠之烈禍非天有意生凶人乃衣冠之自喪其生理凶人之絕滅非天有意誅凶人乃凶人之自造其惡孽一感一應皆理之常又何怪焉

邑人浦翁諱號繼岩少負豪氣力作立家中年爲子娶婦便棄家事築茅室於嵩山獨居是其先人墓地也食淡飲水極人所不堪而翁晏然其中種松課一二村童自給與世若隔垂三十年真吾邑

之高隱也。予慕其風，以扇一柄書淵明詩寄致。景仰翁執扇歛歛曰：「此可爲子誌。」予有知已矣。詩  
東方有一士，披服常不完。三旬九遇食，十年著一  
冠。辛苦無此比，時有好容顏。我欲觀其人，晨起越  
河關。青松夾路生，白雲宿簷端。知我故來意，取琴  
爲我彈。上弦操別鶴，下弦驚孤鸞。願留就君住，相  
期至歲寒。後有考遺逸，於龍山梁水之間。如翁者，  
豈可使之泯泯哉。

鳴道集說一書，金進士李之純所著也。其說以儒佛



一家佛教以吾儒而盡發因歷詆諸儒之闢佛者  
極言醜詈此坐井之見本無足置齒牙間獨就其  
言較之彼所推崇以爲知道者則介甫父子子瞻  
兄弟與張無垢之流而深鄙以爲不知道者則在  
洛闡君子甚又詆橫渠之書爲諂諛溫公而作有  
是非之心者其言然乎記曰行僞而堅言僞而辨  
學非而博順非而澤之人也與然則其得生於女  
直亂華之時也亦云幸矣

伊川云吾四十歲以前讀誦五十歲以前研究其義

六十歲以前反覆紬繹六十以後著書按伊川童而受學於周茂叔十八歲便上書省試論傳於天下長而日與明道同事其所言猶如此則知其所云研究紬繹者皆實體實驗自得工夫非文義之謂予甲辰歲聽講於東林始知有學之一字時年四十矣茫無知識安得便有進步回思一生碌碌所作何事豈不慙負天地

宋神宗卽位謂文彥博曰天下敝事至多不可不革又曰當今理財最爲急務養兵備邊府庫不可不

豐大臣宜共留意節用噫神宗之留意如此宜其一聞王安石議論如膠漆之不可解也二年春以富弼同平章事王安石參知政事帝訪治道弼對曰人君好惡不可令人窺測可測則姦人得以傅會又問邊事對曰陛下臨御未久當布德惠願二十年口不言兵他日入對又曰君子小人之進退係王道之消長大抵小人惟喜動作生事則其間有所希覬若朝廷守靜則事有常法小人何望哉言言切中幾先然而神宗聽之如水沃石之不相

入也則以成心先定故耳亂天下者雖曰安石實  
神宗資性已成不遇姦邪則不相契合故曰明主  
務學爲急又曰大臣先格君心之非以此之故也  
仁宗朝有薦王安石可大用者仁宗曰安石心術不  
端非佳士薦者請問其故仁宗曰嘗宴內苑觀魚  
侍臣誤置魚餌一盤於安石案安石食之而盡夫  
食一丸則可言誤食之而盡此詐也蓋安石平日  
止食近前一器遠者俱不食以爲志不在也然矯  
情干譽無微而不用如此不知仁廟已窺見至隱

矣。安石在仁廟不得行其志。在神宗朝則得行其志。此在二廟心術中有邪正之辨也。故知人不足與適。惟在格君心。

題嚴灘釣臺詩曰披裘不是釣魚人。一着羊裘便有心。當時若着簑衣去。烟水茫茫何處尋。此以名心窺子陵者也。又有詩譏光武末句曰糟糠之妻尚如此。貧賤之交何足數。羊裘老子早見幾。獨向桐江釣烟水。此以利害心窺子陵者也。皆不足以知子陵。夫當子陵被訪之時。炎劉之舊物已復東京。

之制度已定光武雖賢然不任三公事歸臺閣其規模不及乃祖遠甚欲進而語以帝王三五之道其不可望明矣則子陵於此時而出不過與雲臺諸公相爲頡頏耳何足以當子陵惟橫足一加使天下知爵祿之外別有高蹈功名之外別有事業是以醒一世之人心而啓東京名節之風故其效至乎姦雄環列脫神器而不敢動天下方知皆桐江一絲挽留之功也夫然後名與日月爭光直追蹤巢許而可與臯夔契禹易位同芳者也豈不偉哉

惟陳白沙先生詩曰三尺羊裘幾鉢兩千秋龍衮  
共低昂。留得先生在台輔。不知東漢可陶唐。此可  
與談子陵之心矣。

春秋首書春王正月。諸儒以爲千古不決之疑。據胡  
文定云。以夏時冠周月。謂周正月本建子。夫子加  
之以春。此於理終是未安。故朱子云。如文定之說。  
某便不敢信。據今周禮有正月有正歲。則周實是  
元。改作春正月。夫子所謂行夏之時。只是爲他不  
順。欲改從建寅。自朱子此說一出。諸儒信而從之。

無復疑辯且行夏時一證尤爲的確故新安汪克  
寬氏旁引遠證以申明之其一證曰禮記稱季夏  
六月以禘禮祀周公又引孟獻子言七月日至可  
以有事於祖而曰七月之禘獻子爲之據此則是  
以建巳之月爲季夏矣

此一證也

又引前漢書律

曆志周師初發以殷十一月戊子亥月後三日得  
周正辛卯朔子月合辰在斗前一度明日壬辰至  
戊午二十八日渡孟津明日巳未冬至是歲大寒  
中在周二月巳丑晦庚申爲二月朔越四日癸亥



至牧野又引外傳伶州鳩言武王伐殷之日歲在  
鶉火月在天駟日在析木之津辰在斗柄星在天  
龜以唐曆邇而上之日月星宿無一不合則泰誓  
之春卽武城之一月明矣又一證也泰誓曰十有

三年春大會于孟津周已改春明甚

又云近世之

論有主建寅而未改月者考之春秋所書災異如

十月隕霜十月雨雪之類若夏時十月霜雪何爲

災異惟周之十月是夏八月所以爲異

及日食交

限以曆法逆推之

則不合自此說再明其理益瞭

然分明而說可定於一矣

文事武備、儒家一事也。三代以前必合，三代以後裁然分兩家矣。有儒而將者，漢諸葛武侯一人而已。於我朝，王文成又僅見之。有將而儒者，如漢壽亭侯、唐張睢陽、暨汾陽王、宋岳武穆、四公可以當之。邵康節詩曰：軍中儒服吾家事。諸葛武侯何處尋？康節豈以自任耶？使康節而當其任，必可無忝。此言可爲知者道耳。

楞伽經有一語，快問諸佛心心相授，云何曰諸佛心。

心相授云妄想無性

饑來喫飯困來眠今日明朝

四字所傳不同

總一般

若人問我西來意月在長空水在潭  
禪家本領大約是此個意思  
泰州王東厓因作一詩曰月在長空  
水在潭百千景象盡悠然  
有時月落潭無水此際君當仔細看  
以醒一僧也蓋吾儒之理有時以饑  
食渴飲夏葛冬裘爲道者

二句程子語

又有時

酒清而不飲人饑而不食爲道者  
甚有時饑餓而歾爲道者  
有時以嚮晦入宴息爲道者  
又有時終

夜以思坐而待旦以爲道者東厓之意正爲此發  
惟其一以饑來喫飯困來眠爲道故有操刀屠醉  
酒漢淫人娼立地皆可以證道之說此其惑世誣  
民豈不可畏真有志爲已之學者於此等處可以  
參入 王東厓名穰心齋先生次公

客有舉陳同甫亮與文公書以問者

書曰堂堂之陣

正正之旗開拓萬古之心胸推倒一世之豪傑曰

同甫談經濟乃學問日用朱子定以功利少之豈  
必意誠心正之外無一事可爲者耶予應之曰同

甫誠用世才也然試度之以同甫爲相能過於李  
忠定公綱之相業否客曰雖未必能過也如李忠  
定之相業亦何碍於學予曰以同甫爲將能過於  
宗澤韓世忠岳飛之勇畧否客曰雖不能過也如  
宗韓岳之將亦何碍於學予曰固也夫以高宗渡  
江李忠定在朝宗澤在疆塲韓岳共事復中原反  
掌間爾而高宗先蔽於汪伯彥黃潛善後盡於檜  
賊謫者謫歿者歿誅者誅將相無自全之地爲少  
正心誠意之功乎爲少談經濟之畧者乎客不能

答予曰不惟是也試以今日追思同甫彼所爲開  
拓萬古之心胸者何在推倒一世之豪傑者何事  
固知正心誠意學問之真源而經濟之根抵也則  
此二語實惟文公當之矣坐客皆曰然

春秋曲沃桓叔莊伯以支庶奪晉宗莊伯武公歿傳  
其子獻公詭諸患桓莊之族偪謀諸士薦士薦曰  
去富子爲富強之族則羣公子可謀也於是誘羣

公子譖富子而去之殺游氏之二子士薦告晉侯  
曰可矣乃城聚而處羣公子周惠王八年冬晉侯

圍聚盡殺羣公子於是桓莊之族遂無孑遺夫身  
以族奪嫡遂以忌族而行此慘毒天之報施巧矣  
不惟是也自獻公之後諸子相殘卽文公定霸而  
其後無一人公族得柄政者皆起於忌族之一念  
也卒之政歸六卿直至三家分晉中無一人能復  
振者蓋斲喪本宗其來久矣惡萌於一念禍遺於  
奕世感應彰彰不爽毫毛可不鑒哉晉六卿先世  
之賢首推范武范文而范氏先亡意者其禍源於  
是歟

萬曆朝張江陵奪情、有寧國生吳昌言其非、草疏

將走京師上之、江陵預聞、囑寧國有司禁止、二府  
龍鍾甫者、以爲奇貨、卽逮至獄、慘加考掠、吳生作  
絕命詩、文數章、歿獄中、江陵敗、妻詣闕訴夫冤、逮  
鍾甫、謫戍後、蘓人伍袁萃備兵戍、所聞鍾甫安然  
在家、移檄文攝之曰、批鱗義士、尚遵君命、以投荒  
舐痔邪臣、乃眇天威、而離伍鍾甫見之、發狂、自投  
於厠而歿、又吳縣尹袁某、癸丑進士、貪穢無與對、  
以墨去官、歸而發頰、口自稱、歿罪不應得某行銀



某人銀命速取銀至自投於牆外家人私收之則  
又叫號不已復取至手擲之其家鎖禁之世人謂  
此二人者其先皆曰智也巧也其後皆曰狂也癡  
也愚曰不然方其殺人媚人見利忘身是則狂也  
癡也其自愧而死自悔而稱罪是乃良心之見而  
天理之發最清明之氣也世人智其狂而狂其智  
宜此輩接踵也夫宜此輩接踵也夫  
吳詩文另錄  
問心性高先生曰性不可言也而以仁義禮智言性  
心不可言也而以敬言心此程朱之明心見性也

愚按一言而儒學禪宗了然無容再辯

國朝 世廟時宰相張孚敬議從祀孔廟大典特進  
歐陽修原其故蓋孚敬以論大禮遇合而其意正  
與歐陽論濮安懿王之事同故特崇而奉之此私  
情也歐陽公擅一代文章之宗其奏疏侃侃忠益  
仍有昌黎之風宜與昌黎比肩第其言曰性學非  
人之所急較昌黎三品之言又差數級矣後有議  
進黜者尚恐有遺議如公者祀於鄉可也

二程先生一日赴宴有官妓在焉伊川終日正色不

語明道言笑如平常翼日伊川語明道曰昨日之  
會甚無爲明道曰二第恁地好色伊川曰何謂也  
明道曰昨日本有吾心却無今日本無爾心却有  
伊川歎不及噫物各付物順事無情非直臻化境  
烏覩此乎王戊

叔肸不義宣公之篡終身不食兄之祿賜之財則辭  
而亦不去國子鮮不義衛君之食言去之他國終  
身不向衛國而坐他日授之位則辭季扎不義闔  
閭之弑不受其讓亦不討其罪終身老於吳三賢

處人倫之變其行不同而委蛇其道以自潔其身  
同一轍也夫子俱登於春秋與之深矣胡文定謂  
季扎不受國以致亂爲不能承兄之志定春秋書  
扎爲貶辭夫以闔閭其人而季扎居位則在所必  
誅闔閭不誅則必復弑扎扎見及此矣故曰是父  
子兄弟相賊無已時也則扎之讓重天倫而輕千  
乘宛然讓皇心法也夫子何惡而貶焉後夫差之  
狂也季扎猶在而不一言及國扎之心蓋可見矣  
若季子三賢中之尤出類拔萃者也

陳白沙受業吳聘君康齋之門他問無不答惟問易則不答白沙問不置終不答白沙不解其意後別歸康齋語之曰子所問易義多矣欲知其解當就其所覓龍潭老人問之白沙欣然受命往至其地問龍潭老人無能識者適見一老披簑而鋤就問之老人曰子從何來自沙曰從吳聘君來老人曰吾能識之引白沙歸具黍設榻因語白沙曰龍潭卽予也白沙大喜因請易義剖析精微無不曲暢白沙盡破積疑老人姓吳四隣無知者因謂白沙

曰康齋非愛我者後日復訪之則遠徙矣噫成都  
篋匠此真再見潛龍弗耀何代無人第非伊川白  
沙則不可得而遇耳

按左傳黃池之會吳申叔儀乞糧於公孫有山

魯人

曰佩玉縈兮余無所繫之旨酒一盛兮余與褐之  
父睨之對曰梁則無矣麤則有之若登首山以呼  
曰庚癸乎則諾解者殊不得其意愚詳其語蓋叔  
儀欲歸魯也其曰乞糧託言耳觀其語曰佩玉縈  
兮余無所繫之明乎已之有具而無所效用也旨

酒一盛兮余與褐之父睨之明乎有意食魯之祿也褐父貧者之詞意用歸者非止一人矣有山荅曰梁則無矣麤則有之明乎言魯之高位重祿不可得僅可以得食而已蓋魯非能用人之時有山之意不欲叔儀歸魯也下又繼之曰若登首山以呼曰庚癸乎則諾此語尤有深意庚者更也癸者歸也首山卽首丘之意叔儀之所由來也言若尋根本而更歸乎則許之蓋勸之還楚也叔儀本楚申叔時之後故有此言觀叔儀之言已知吳之必

亾觀有山之言已知魯之必不可爲所以皆托之  
隱詞也國君無道才士不得所之狀宛然可見故  
左氏志之

毘陵有王祥孝子廟孫聞斯公去其額黜其祀題一  
詩曰百年遺廟在城東名姓兒童口說中若問身  
名千載事三朝元老大司空陳希夷聞宋祖黃袍  
加身笑而墜驢曰天下自此太平矣世羨其神仙  
前知公爲說以醜之此關係名教扶植綱常鉅識  
也學者不可不知



春秋傳魯人會葬曹平公見周原伯魯焉與之語不  
說學歸以語閔子馬子馬曰周其亂乎夫必多有  
是說而後及其大人大人患失而惑又曰可以無  
學無學不害不害而不學則苟而可於是乎下陵  
上替能無亂乎夫學殖也不學將落原氏其亾乎  
按此言今之俗且舉世以爲然矣子馬之言可不  
畏歟

戒慎恐懼是慎獨。隱微顯見是面目。中和天命本明。  
明道教熙然成位育。中和須識中爲體。誠明須信

誠爲性如神知化本無他經綸大本由心定二詩  
一大德夢中受之朱夫子者也朱夫子且語之曰  
吾工夫至今未嘗息然所見已非昔日矣

今之論詩家曰愁苦怨恨非佳境也惟入詩則無不  
成佳此唐人活計也自擊壤集出而盡翻此境滿  
目樂趣四者隻字不入口我朝白沙繼其響脫  
換無復此態蓋其方才間迥乎霄壤別爾乃知詩  
家所云唐以後無詩有識者正謂宋以前真是無  
詩耳

孟浩然詩重一時王摩詰引入禁中時玄宗適至浩然伏床下摩詰不敢隱奏聞上大喜命誦半日所爲詩孟誦不才明主棄多病故人疎上不悅曰誰棄你何不誦氣蒸雲夢澤波撼岳陽城遂不召見人以此爲浩然惜謂孟詩已傳聞御聰又得面陳而所誦不合命也夫愚謂此鳩鵲之見也山林之士一旦聖問及之而誦詩自炫何鄙如之不才明主棄却是當時事實質言也玄宗不召自是以文才取士無意於山林隱逸耳然而孟浩然之節成

矣太白詩曰吾愛孟夫子風流天下聞紅顏棄軒

冕

孟自言之則曰明主棄太白言之乃浩然棄軒

冕也

白首臥松雲醉月頻中聖

魏徐邈中聖人故

事

迷花不事君

桃源故事

高山安可仰徒此挹清

芬可謂知浩然者矣我

太祖高皇帝時一士某

入朝出一詩示同列曰四鼓蓼蓼起看衣五更朝

見尚嫌遲何時得遂田園樂睡到人間飯熟時及

入朝上已緝聞之矣因謂曰朝來好詩只是誰

人嫌你何不道憂字遂放還山此却處之適當其

人然而臣下一言之善猶得上聞此則二事皆休  
盛之風不易得也

中庸率性之謂道註云率循也說者謂率字有自然  
之妙循字費力不如率字此便是學問毫釐千里  
源頭也詩曰不愆不忘率由舊章率原是用力字  
歷觀詩書率字無不然者只爲世人不識性便不  
識率字若識得仁義禮智是性乃知一步不率循  
便是迷性便是離道如何任得自然如何不須用  
力所以下緊說戒愼恐懼工夫正謂少不得率字

氣力也

薛文清公十三歲能詩文後自悟曰此非吾用心之地遂日夜讀濂洛諸書王文成公六歲作金山詩十歲外能古文詞後自悟曰安得敝精神於無用之地於是入山靜坐遂能前知又自悟曰此猶是拚弄精神然後一意聖學至龍場而始有得此二公出處類也以文章名世者自以爲足千古正爲少此一悟

王維詩宿昔朱顏成暮齒須臾白髮變垂髫平生幾

許傷心事不向空門何處消可謂無聊之計矣蓋  
才華富貴一無可恃若此學問可貴無他必不入  
此可憐場耳

讀六十四爻象方知聖人之學效法天地效法四時  
效法萬物無處而非學無時而非學也故曰聖希  
天

詩經十月之交註主天體左旋日月星辰右行書經  
棊三百有六旬註主天體左旋日月星辰隨天左  
行二說不同者朱子讀天文書又精天文蔡九峯

但讀其書不精天文故也此惟天官家能辨之

太祖高皇帝深明天象故命儒臣改正蔡傳

見皇

明國朝典則

學者不可不知

太白詩奇奇惟惟文能泣鬼世所推以蜀道難爲第一殊不知此章特險語驚人不可迫視奇在詞耳幽眇變幻莫知端倪最極工巧在古離別一章聊爲箋之雖詩人含蓄意味最忌指破而舊註云此天寶時作也已明示其端矣詩曰遠離別古有皇英之二女乃在洞庭之南瀟湘之浦海水直下萬



里深誰人不言此離苦日慘慘兮雲冥冥猩猩啼  
煙兮鬼嘯雨我縱言之將何補皇穹竊恐不照余  
之忠誠雲憑憑兮欲吼怒堯舜當之亦禪禹君失  
臣兮龍爲魚權歸臣兮鼠變虎或言堯幽囚舜野  
歿九疑聯綿皆相似重瞳孤墳竟何是帝子泣兮  
綠雲間隨風波兮去無還慟哭兮遠望見蒼梧之  
深山蒼梧山崩湘水絕竹上之淚乃可滅按離別  
歎明皇別貴妃也馬嵬之禍一段別離慘境豈不  
天下之至苦却不知都是日前寵愛蠱惑所致白

日晝晦則陰類出現

自首至鬼嘯雨一段

此理昭

昭人所共知但言之於有事後則無及言之於未

事前則恐反逢怒耳

我縱言之至吼怒一段

及至

天下已亂不得不禪位太子肅宗立而權佞用事

明皇雖復歸京師而不能得志竟鬱鬱以歿

堯舜

當之竟何是一段

追其禍源皆貴妃所致可爲痛

恨者也而明皇不悟反終日思念妃子至歿不已

豈不大惑終身不解乎

帝子泣至末

通篇極哀極

怨極感極傷而微言隱寓出入三昧有無窮之慨

古今絕調也。白樂天長恨歌特翻其結句餘意耳。太白詩可採入經者惟此章與清平調寓言於皇英者子貢問伯夷叔齊何人也。

出處之際難言矣。當國事危疑存亡決於進退之時必於潔身爲是則盡力扶持之義何存。如甯武子之愚狄梁公之自挽國之所賴者必若人也。安得輕言去乎。若必於殉國爲是則王嘉楊震之徒可謂竭忠盡慮國爾忘身矣。而於國事無纖毫補。徒冒不能見幾明決之譏。此又何可蹈也。若云逆計

其可成則爲之計其未必成而去之又恐成敗利鈍雖智者所難逆覩也此其中有機焉事有可爲雖一絲之力未殫不可去也雖不必成無害於以身任也事必不可爲雖一日不可留也以空名爲補救必不濟之道也王嘉楊震正坐此乎

宋太宗爲長公主分艾炷藥親親之義何篤也此未必出於要譽惡聲蓋亦天性之自現耳然而聞趙晉太祖已誤之言則廷美得罪矣德昭德芳歿矣是獨何心歟故知良心觸發能不昧於卒然俄頃

之際而利害惑心每迷謬於從容計較之時人也  
天何改焉天何改焉

人心世道之惡自唐虞而後日趨日下春秋靡爛極  
矣究其病源皆鍾毒於一利字故自開卷書納閔  
易祐極而至於范鞅荀躒之於魯昭亂臣賊子之  
所以接踵而不止公行而無忌皆因此道也天理  
民彝泯而無存夷狄猛獸其毒寧至此哉故孟子  
七章首嚴此辨真是頂門用針爲一世開生路也  
道學一脈源於洙泗迄今何啻千年然而不可用於

世如出一轍果以迂濶而難爲乎非也其于衰世  
大不便有三凡講學人於君身先閉逸樂門此人  
主之大不便也於權佞先閉威福門此左右大臣  
之大不便也於一世先閉賄賂門此冒進作奸羣  
小之大不便也試思三門有一不閉欲幾天下治  
平其可得乎則學人之不宜於世又何疑

易介于石不終日貞吉聖人繫於豫卦可見轉移世  
運只有當幾一着卽如武王克商孟津之舉惟十  
有三年春此其介也蚤一日不得遲一日不得如

曰文王之德已光四方顯西土三分有二之業可  
以旦夕而永清四海何俟十三年這就是鳴豫之  
凶又如曰獨夫之惡終當自斃何待戎衣之看十  
三年可以坐致太平這就是盱豫之悔惟商惡已  
盈倒戈之人心已極西眷之天休已至而牧野之  
陳適當癸亥之期不先不後則武王之介如石之  
貞也非知微知彰何以及此

癸亥

春秋書許世子弑其君傳以爲不嘗藥之故非也縱  
嘗藥亦不免書弑何也世子止之罪在於輕用藥

用藥生歿之介也。君父生歿之介無真見焉而漫試之可乎？父飲藥而歿則子之罪已無所逃。豈曰已嘗焉則子心可自慰也？孫宗伯聞斯引此款以証光廟紅丸之案此爲定論。

任元受字盡言。事母盡孝。母老多疾病。未嘗離左右。元受自言老母有疾。其得疾之由。或以飲食。或以燥濕。或以語言稍多。或以憂喜稍過。盡言皆朝暮候之。無毫髮不盡。五臟六腑中事。皆洞見曲折。不待切脈而後知。故用藥必效。雖名醫不逮也。張魏



公作都督欲辟之入幙元受力辭曰盡言方養親  
使得一神丹可以長年必持以遺母不以獻公也  
况能舍母而與公軍事耶魏公太息而許之按事  
親能如元受豈有誤藥而喪親之事耶則知聖人  
書許世子止弑君其教後之意深遠矣

季彭山諱本陽明先生高足也博學多才著述甚富  
其讀書法每棹一舟入水鄉與鷗鷺羣終日展卷  
人跡不能達愚謂此真水仙舫也如水仙舫故事  
以別舟載女樂相追隨何稱水仙哉

陶韋評爲詩聖陶之得此名宜竊怪韋何以得並列  
偶閱一選集先見陶結廬在人境而無車馬喧問  
君何能爾心遠地自偏採菊東籬下悠然見南山  
山氣日夕佳飛鳥相與還此中有真意欲辨已忘  
言讀過如身入清虛境無一點塵氛氣又見一篇  
今朝郡齋冷忽念山中客澗底束荆薪歸來煮白  
石欲持一樽酒遠慰風雨夕落葉滿空山何處尋  
行跡頓覺爽氣襲人雖李杜諸人無此一段風韻  
也乃知論詩者自能具眼

兩結句相敵

宋朝每狀元及第賜書一篇此法甚美始於太宗首  
賜儒行篇仁宗朝或賜大學篇或賜中庸篇更爲  
得聖學精微遂開理學之源程夫子表章學庸蓋  
由於此惜乎我國家不踵而行之也

伊川講筵諫折柳事卽呂范諸公以爲不必如此此  
未深知伊川者也布衣爲人主師是一時極盛事  
故必以聖人蒙養期上凡此皆爲萬世立師極也  
豈論一時行不行哉伊川每說書必歸於君身一  
日講賢哉回也章衆竊謂如何規說至末曰顏子

亞聖也。簞瓢陋巷，季氏權臣也。富陪周公，則魯君之政事可知矣。衆皆嘆服，抑此不特講論之妙也。哲宗資品，伊川有以見之真矣。

伯禽康叔三見周公，而三笞問商子。商子令觀南山之陽，見橋竦焉，而仰曰：父道也。南山之陰，見梓勃焉，而俯曰：子道也。明日見周公入門而趨，登堂而跪。公曰：安見君子？二子曰：見商子。公曰：君子哉！商子按如二子，方可爲善學。如商子，方可爲善誨。如周公，方可爲善育。善育之道，如何使二子知有商

子可問也

晉初人品當以孫登爲第一觀其行已議論天下皆知其賢而不見忌於司馬昭則若潛若見之間必有故存焉此叔夜嗣宗不能望後塵者也可爲子陵之亞流鹿門水鑑之超乘矣

盧坦有云今人奔尺寸之祿走絲毫之利如羣蟻之附腥羶聚蛾之投燭火取不爲醜貪不避殒案此言於今時尤可浩歎然鬚眉丈夫惡可以不自砥宋郭原平父母墓前田耕者裸袒原平見之貴買此

田農月輒自束帶躬耕此可爲不忘其親矣

堯時四凶族有渾敦窮奇檮杌饕餮之名而莫知其

說按海內東北經曰三危山西曰天山莫水出焉

西流注於陽谷有神狀如黃囊赤如丹火六足四

翼渾敦無面目是識歌舞驩兜比同頑歸目無辨

別故以渾敦比之神異經曰窮奇狀如牛而色狸

尾長曳地其聲如狗狗頭人形鈞爪鋸牙逢忠信

之人齧而食之逢奸邪之人則捕禽獸而飼其工

專誣害盛德故以窮奇比之檮杌西荒中獸如虎

毫長三尺人面虎爪口牙一丈八尺人或食之獸  
鬪終不退却惟歿而已荒中張捕之復黠能逆知  
伯鯨傲狼亡身故以檣杪比之北山經曰鈞玉之  
山有獸羊身人面目在腋虎齒人爪音如嬰兒名  
曰狗鶚貪婪食人未盡遂害其身三苗飲食貪冒  
故以饕餮比之由此四物言之則窳窳大風封豕  
鑿齒長蛇之類皆以物比人可以類通也

爾雅翼宋新安羅公願註博雅士也其說詩中所陳  
草木鳥獸俱有精意較郭景純進一籌矣

不能詳

錄

其他所載俱考訂詳明如說甘泉賦曰天子穆然珍臺閒館旋題玉英蛸蛸蠖蠖之中解者以蛸

蛸蠖蠖爲刻鏤之形予按釋魚

書名

有蛸蠖水中

小赤蟲莊子所謂還虬者藏沙泥中穴如針孔而  
蠖尺蠖也亦吐絲作繭有所布濩以此况帝者蓋  
退藏於密精義入神之至也此言極有理而確矣  
茶清品也知其妙者在盧月川歌中若用以解醒滌  
膩此茶之功不可言茶趣故胡人得茶則愈宿疾  
非不貴茶也以此飲茶失茶意矣茶之產非一山



隨地有珍品大約必生於山石不邇沃土者爲上其性之清貴然也然烹之必得佳水以錫山泉爲最宜雖中冷不及也烹之火候有法盡其法方得茶妙吳中以此爲尚有烹製極精者然而稱知味蓋難言矣嘗論之茶有五可飲四不可飲濡毫吮素藉以通靈竅啓玄思此爲第一宜飲清風明月佳客談玄焚香揮麈此爲第二宜飲山前水次登臨未已屢履憩息此爲第三宜飲窓前夜讀或興至高吟或行歌互答此爲第四宜飲寤言一室午

夢初醒此爲第五宜飲若夫珍羞羅列觥籌交錯  
腥腸濁膈呼之於醉飽之餘此與入胡人之腹相  
去幾何是爲膳飲但食茶之葉者也其有衣冠盛  
會賓主雍容擎拳曲跪執盞再拜而中則實以甘  
菓薦以異香此於茶重矣而貴非所貴亦無異規  
方竹之杖漆斷文之琴者也是爲賊飲食茶之節  
者也又有花石園林笙簫畫舫博奕彈琴清歌雅  
笑此其於茶近矣而口不談詩書目不識古今胸  
中不帶烟霞之氣徒點茶之清名賞畫以膳脂而

愛梅以其實將何取爾乎是爲蟲飲食茶之根者  
也其尤爲可笑者更有一品有斛二之癖品貴名  
山價爭珍重研烹煎之法甌錙極選火候微調以  
希鴻漸之後塵而自朝至暮口不停啜鼻不停嗅  
手不輟洗滌自咤真好借問所謂搜枯腸發輕汗  
者不知意何爲也此其於茶尤爲失真是嗜而傷  
其心者也直謂之螟飲而已四者未嘗不知茶而  
實爲茶害故評而列之以爲仙品解厄

說詩家曰莊姜之詩其自處則曰我思古人實獲我

心其處人則曰乃如之人兮逝不古處動輒曰古  
不合時宜甚矣宜謔浪笑傲而莫往莫來也

鍾伯

敬說

此言最爲有味

石門道者居石壁中十有三載矣余冬月探之問終  
日在此作何工夫道者曰人生苦四大爲累然終  
日受用只此四大但其性最直降伏他不得有主  
人則自供職吾終日在此只常作些主此外更無  
事乃吾真實語也余味其言爲斂衽重之

石門在

龍溪第二峯道者終日靜坐不下山贈以銀錢不

受但受米儲一木桶受五升盈桶則亦不受矣匱  
乏則瞋目卧

鳳翔府吏呼東坡爲蘓賁良陳希亮怒曰府判官何  
賢良也杖其吏至命公作凌虛臺記不易一字公  
曰吾不假以辭色以其年少暴得大名懼夫滿而  
不勝也若陳公可謂善成人者矣東坡未免辜  
負此老

高存之先生手錄二程書首書一條明道云百官萬  
務金革百萬之衆飲水曲肱樂在其中萬變皆在

人其實無一事另列一葉蓋先生學問得力因有會此言也不肖手錄先生二程書亦首列一條以竊附先生之意明道云人能放這一個身公共放在天地萬物中看則有甚妨礙雖萬身曾何傷愚雖不敢言有會竊有味乎斯言也甲子

東林九日首會得見劉念臺公講克復章凜凜正議而辨別理欲極其清楚洵哉有體有用之學也可謂豪傑士矣座中尚論微不滿於薛文清存之先生盛爲稱揚念臺徐曰易儲一事文清時以大理

卿理餉雲南歸而不譖猶曰位不在也于忠肅臨  
刑之日時文清在內閣建言云天子新復辟不宜  
誅戮以傷天地和氣于初擬極刑因文清言擬斬  
此時爲慊心否乎高先生曰論至此却不能爲文  
清解可見後世眼可畏不爲你絲毫隱漏也念臺  
又曰所以文清不久去位以爲曹石之故非也只  
此事文清已不能安其位此論尤爲深心善體後  
將別去高先生曰此會可以千秋

存之先生曰耳聽目視手持足行皆心也謂此心之

外更有一微妙之道心是爲騎驢覓驢謂此視聽持行者卽是真心又未免認賊爲子聖賢於此正有妙法點鐵成金所以卽妄卽真也

臣道篇國之將亡朝廷百吏姿貌多美顏色諧和詞氣華柔知言哉

仲春偕儲恕行謁淇澳先生問易先生授旨曰易不是口談的只此一語知平日曉曉誤已誤人其罪大矣服膺先生之言作受戒僧可也

淇澳先生談次日人言太史公是非頗謬於聖人只



列傳以伯夷居首後人能窺見其微旨否夫子曰  
殷有三仁三仁心事各竭必竟讓伯夷一頭地也  
玄沙門下有靜上座人問弟子每當夜坐心念紛飛  
未明攝伏之方

切問也

願垂示誨上座曰如或夜

坐安閑心念紛飛却將紛飛之心以究紛飛之處  
究之無處則紛飛之念何存反究究心則能究之  
心安在又能照之智本空所緣之境亦寂寂而非  
寂者蓋無能寂之人也

能寂亦無

照而非照者蓋

無所照之境也

所照亦無

境智俱寂心慮安然外

不尋枝內不住定二途俱泯一性怡然

真性方顯

此乃還源之要道也按此答最爲真實然識儒門主敬則知其層層推究皆如水中撈月法也

蕭同江知數學者也其言曰後天圖與先天方位不同皆因交而變也乾坤交三三而互巽艮故後天乾居艮位坤居巽位坎離交而互離坎以坎互離則中畫變陰而坤體全矣故居坤位以離互坎則中畫變陽而乾體全矣故居乾位震巽艮長男長女交而互兌乾故巽居兌位而與乾爲對矣艮兌少

男少女交而互坤震故艮居震位而與坤爲對矣  
其震兌二卦則居離坎者震木氣旺於東離火其  
子故就離位兌金氣旺於西坎水其子故就坎位  
且震兌一交則却好互坎離也艮而與巽交却好  
互震兌也這都是天然排定一毫假不得造作其  
言一大有理

蕭同江

楚人名九龍

少年于冠國山見一仙姑辟穀

四十年矣於經史無所不通授蕭以道家言二紙  
其一言曰一字俱無一輪朗照出入自由去來神

妙彷彿杳冥。貞靈顯兆。性蒂命根。皇天聖道。其二  
曰。有爲無爲。神之又神。虛靈不昧。正覺無情。一塵  
不染。無影無形。形神俱妙。與道合真。後不知所往。  
味其言。真得道者也。蕭自云。二十時受言。自此遍  
訪歷求。參証羣書。凡六十餘年。始知一字不虛。蕭  
年已八十五。日一食。沉靜而精爽不衰。真有得於  
內養者。先後天之說。豈卽得於仙姑者歟。

終身讓路。不枉百步。終身讓畔。不失一段。朱仁軌訓  
子語也。最爲可味。

孟子不言易渾身皆易也然曰無以小害大無以賤害貴易之精蘊盡於此言矣老氏知其雄守其雌此陰道也便是術數易道不然分陰分陽迭用柔剛故曰見羣龍无首吉道之與術則有分矣

禪家有得在未有見時既有見之後一字俱無故善禪者不言禪談禪而自曰有悟焉者不知禪者也儒家得力在既有見時既有見之後事事不得放過儒而曰無所事事以爲得悟焉者不知儒者也愚學儒而不知禪者也故終不敢言悟字終不敢

以儒與禪混也

農家擇種深耕多糞此根本上功夫也去草萊滋雨露時燥濕此調養功夫也兩者有先後不可偏廢徒知根本功夫而廢調養是置苗於室中者也嘉種沃土爲無益矣世所云心學務本源而忽窮理交修者似之用力調養而忘根本是勤芟耘時雨露而置苗於石田也何生生之有世所云俗學務聞見力行而不求本源者似之

儲康穀偶問詩一言以蔽曰思無邪禮一言以蔽曰

無不敬易一言以蔽當是何句愚答曰句句是儲  
日子姑舉一句曰君子終日乾乾儲躋之

異教有口訣不輕授留爲盡頭一語吾儒有口訣必  
從頭直指故大學曰明明德中庸曰天命之謂性  
論語曰時習孟子曰仁義而已矣皆第一義第一  
句也推之五經無不然高先生曰異教據妄究竟  
一個無故以爲完着吾儒表真故起首便揭要義  
六科公疏參南樂相天垣居首者魏大中嘉善人高  
先生門人也於是南樂大恨一時元老正人俱逐

矣人有爲先生惜官因而尤魏掌科鋒鏑太銳者  
夫道學之不行千古同案邪正之不容千古同局  
先生此去青史標芳宇宙間又成一段丰采若曰  
曷不少留以爲國家造福卽枉尺直尋餘智也君  
子豈其然

晉郗超好棲遯之士每爲之起居室作器用市童僕  
費百金不惜也郗可謂真雅尚然以愚論之所好  
者必非真栖遯也閔仲叔居安邑安邑今慕其賢  
問緒子仲叔何食曰日食猪肝一片今日給之仲



叔曰豈以口腹累及安邑耶遂去之此棲遯之槩也

晉尚曠達遂無真品非無真品也潛而不彰爾庾袞  
隱於躬耕穫稻不曲行不旁援跪而把之非隱德  
君子乎潁川太守聞其賢辟爲功曹袞杖鉞荷斧  
曰請受下夫之役太守知其不可屈禮而遣之非  
守禮高蹈乎

邪人害正其妙法無過一黨字於是世人握手閉目  
畏一黨字如讐不知百世而下芳臭兩途於此分

矣與一黨字豈容易得元祐奸黨立林靈素過之  
恭拜人問其故曰此皆星官列名敢不拜假使朝  
廷選擇正人安得如此皂白分清惟出於蔡京之  
手人品如鏡何其真也則今日與逐典者其榮多  
矣

瞑目枯坐非靜也逃名絕利非靜也惟此心光明物  
不能染乃可以不動故有窮岩石室之中遺棄生  
然而猶患定心之難者如周子所云此心潛伏未  
動一旦有時復發也必聖人之無欲斯爲真靜耳

韓樂吾名貞學於王東岩居蓬屋三間陶甕爲生常  
假貸於人爲甕甕坏爲兩壞負不能償并其蓬屋  
失之以詩自咏曰今古乾坤幾換肩眼前得失不  
須憐兩間茅屋更新主四海烟霞結舊緣世事浮  
雲無定在人生何地不悠然廣居原是吾家物自  
古求安愧聖賢居破窖中屢空晏如倡道化俗無  
問工價傭隸咸從之遊隨機誨誘每秋穫畢羣弟  
子班荆趺坐論學興盡則拏舟如別林聚所與講  
如前翺翔清江歌聲洋洋與棹音相應也聞者欣

賞若韓先生者高士不足以名之蓋得道人也

濂溪曰聖學一爲要一者無欲也無欲則靜虛動直  
伊川曰不立已後雖向好事猶爲化物不得以天  
下萬物撓已已立後自能了當得天下萬物讀而  
條知聖學的的有入門處

乙丑

靜中心念紛飛細查究來非是物交之客塵卽是無  
形之妄想心體中豈有是乎但得心中澄然無物  
則自然無事覺得紛飛無端嘗憶高先生論靜曰  
在得盡至哉言乎

高先生云心與身一是小歇脚處心與理一是大歇脚處

甲子冬仕途翻局正人一空於是羣奸得志進一網打盡之策斥逐相繼無寧日其發端始於楊憲臺之列魏忠賢二十四罪其合謀成於魏都諫之叅南樂相不敬也於是有一大老歸咎於激成之過謂以幾十年精力翕聚得正人在位以成今日之局可謂千難萬難而乃以輕躁發機一朝解散其失豈可專委於小人愚以爲不然夫羣賢在列將

以致治平也豈有宮中府中兩奸竝據而姑置之  
不究是治病而不治本源欲望泰寧其何日之有  
若夫君子去小人而必不勝不勝而衆正必去去  
而必受禍千古一轍理勢必然又何惜之有第聖  
人有云藏器於身待時而動動而不括是以出而  
有獲如此而後高壙之準可獲謂羣賢能盡此則  
未爾

不翻貝葉南華不知儒書之大不叅禪機丹訣不識  
聖學之精

魏都諫大中就逮本嘉善人也至嘉興府城開讀士  
大夫至布衣小民擁而號哭者數萬人緹騎爲之  
感動悉解苛虐相敬如賓都諫有田二十畝耳於  
是各出資相餽文士贈以詩不能盡錄道經吾  
錫有一縉紳交餽至二百兩秘其姓一友華姓餽  
以二十兩不肯自言名而去正氣之感人良心之  
不泯如此高先生贈以言都諫錄而成帙紫陽元  
定之後吾道中又見此一番精彩贈言雨露霜  
雪揔是造物玉成至意須善承受富貴貧賤患

難夷狄諸境禪家云一切惟識性中無富貴貧賤  
患難夷狄患難中容易透性患難中一切萬緣  
都斷臨深淵履薄冰禪家過獨木橋竝着不得第  
二念語數條止錄三則不及詳

漢書嚴朱吾丘主父徐嚴終王賈列傳嚴助以事連  
淮南王反棄市朱買臣以告張湯湯歿亦誅買臣  
吾丘壽王坐事誅主父偃以劫齊王自殺族歿終  
軍而南越所殺賈捐之以口舌棄市數子皆以文  
章世而行乃如此其以文策著如相如子雲而



無不取譏當世故漢武之時中外相應以理義之  
文矣而皆以優俳畜之漢宣賞賚賜與而曰不有  
博奕者乎爲之猶賢乎已蓋文不掩行故明主所  
重在彼不在此 國家以經術取士正以求實行  
之士而今世專以文重總使得士如漢室諸人曾  
有益當世否乎乃上自臺閣下逮百僚文章之外  
遂無一途取士欲爲天下得人其將何由後有聖  
王此必變之道也

熊經畧之歟失地而逃誠無所辭第用則使人掣其

肘敗則獨任其咎謂服其心則未也誅荀林父而宥先穀伯國之政不然矣

金沙新臺中建議拆毀書院意在東林也川中張某揚其波則奉旨拆東林關中徽州江右四書院而馮仲好孫聞斯余懋衡俱劓奪矣且鄒南臯顧涇陽兩先生亦追奪矣旣而盡拆天下書院矣此舉宋末江陵業有成案而相尋一轍建議者不足問舉朝獨無一人見及往跡者乎

東林

講於甲辰縉紳輻湊其時盛而繁未幾見齟

於當塗庚戌巳後漸簡漸真癸丑講易則二三君子蒼然隆冬之松栢矣丁巳以來巋然碩果一脈獨存於天地千秋獨立孤麟隻鳳真不可常見於世故僊而升朝僊而雲集而遂不容於今日矣識者謂洙泗之秦火洛閩之胡塵盛極而衰天道必然無足恠也

王元淳名養性會稽人周海門高足也來學於高先生其學重悟而輕修謂本體外無工夫言之可聽而已先生語之曰而今切要體認是性善兩字孟

子道性善必稱堯舜者觀堯舜之聖方知人性本來如此二聖性之極則也故孟子舉以爲性善之象惟天爲大惟堯則之蕩蕩無名無爲而治恭己正南面則是堯舜之象也人只自思人有同於堯舜者其所以同在何處然畢竟人不能爲堯舜所以不同在何處則本體工夫俱躍然矣先生是日輟講遂爲東林絕響

八月朔日

錫之東南有鴻山其西嶺泰伯墓也其東嶺有梁鴻井滌硯池嶺下有一丘號梁鴻墩鴻山之得名由

此九日予偕儲恕行華訥菴謁墓因憩池邊道舍  
諸友集焉誦先生墓碑文因思周業八百而至德  
流光乃與天壤同久潛龍一脈讓皇爲首稱千年  
而後有伯鸞踵其遺跡今去伯鸞又千餘年矣有  
襲其餘風者乎雖爲之執鞭所欣慕焉

有尚論唐太宗宋太祖優劣者愚曰君臣之際唐可  
辭宋不可辭也然宮人私侍黃袍倏加要其心未  
可以差等分也手足之間藝祖之遇非秦王之遇  
也然玄武門之事可辭納巢刺之事不可辭以此

律藝祖其庶幾免乎

神宗末年天下滔滔非鄭黨不進而一時大拜乃有  
劉韓兩君子

天啓龍飛之際衆正盈庭慎擇再三而乃有南樂側  
焉南樂進而葉去葉去而韓逐二朱逐無停軌矣  
蓋前之所以進默兆泰昌之興機後之所以進默  
成今日之時局已焉哉天實爲之謂之何哉

白沙云終日乾乾只是收拾此理而已會此者天地  
我萬化我出而宇宙在我矣得此欄柄入手更

有何事色色信他本來何用爾脚勞手攘舞雩三  
三兩兩正在勿忘勿助之間曾點些兒活計被孟  
子一口打併出來便都是鳶飛魚躍後學每論到  
此等處便謂白沙之自得有異於朱之謹嚴不知  
此正是紫陽真正家法也朱子詩只就吾身分上  
思相呼童子浴沂歸更無一點閑思想正是助忘  
俱勿時惟白沙纔見到個中意思爾

學道有懸崖撒手竿頭進步之語卽朱子全放下之  
意謂已得手則又放下所以爲難也顏苦孔之卓

正在這些子若未得手人將何放下如未登崖而撒手何取義焉故禪家之言曰百尺竿頭不動身雖然見得未爲真百尺竿頭須進步十方世界是全身觀其末則知所謂進步者煞有實見真諦非漫然放下也今之語心學者動以此等語藉口爲自肆之計得無誤已誤人乎

嘗見涇陽先生云看書要得入口滋味又見啓新錢師上書要橫看豎看方得八面玲瓏宜兩先生之深造如此也



漢書梁鴻作五噫之歌曰陟彼北邙兮噫顧瞻帝京  
兮噫宮闕崔巍兮噫民之劬勞兮噫遼遼未央兮  
噫肅宗聞而非之求鴻不得乃易姓運期名耀字  
侯光與妻子居齊魯之間有頃又去適吳按此爲  
漢室末季然以一隱士之言能上聞而動帝王之  
求則上下猶相通也如陳少陽之在宋且以身殉  
言矣若至今日布衣之士雖欲剖心以獻闕而亦  
無由上達矣回視古帝王採民隱求遺逸之風爲  
何如乎豈不可歎

舊語月到梧桐上風來楊柳邊大丈夫不可無此襟  
懷海濶從魚躍天空任鳥飛大丈夫不可無此度  
量振衣千仞崗濯足萬里流大丈夫不可無此氣  
槩珠藏川自媚玉韞山含暉大丈夫不可無此蘊  
藉頗愛其語因續之曰玄酒味方淡大音聲正希  
大丈夫不可無此見解日月籠中鳥乾坤水上漚  
大丈夫不可無此達觀秋月揚明輝冬嶺秀孤松  
大丈夫不可無此風味兩儀常在手萬化不關心  
大丈夫不可無此作用

朱子詩昔誦離騷夜扣舷。江湖滿地水浮天。只今擁  
鼻寒窓底。爛却沙頭月一船。觀扣舷之思豈嘗一  
日忘國家哉。而至於爛却沙頭之月。則已付之無  
可奈何而已。此詩感慨視居夷浮海之歎。有更痛  
焉者矣。

人不能於聖賢脈路上開眼。雖高才絕學。不能脫世  
俗之見。如太史公文。雄千古。然於周家王業。曰太  
王陰有翦商之志。而泰伯不從。遂欲傳位季歷。以  
及昌。此豈可語大聖人心事者。居岐之陽。實始翦

商詩人之意盡失於此數言矣又子貢何品也因  
夫子賜不受命之語遂作貨殖傳以子貢爲首已  
爲可笑且云因子貢多財交遊列國夫子名譽益  
彰是何語也總是以俗情輕於弄筆不覺取笑於

明眼